



COPIA

MOCIÓN SOBRE A EXECUCIÓN DUN PLAN DE ACCIÓNS URXENTES PARA EVITAR OS RISCOS DE INUNDACIÓN EN DISTINTAS ZONAS DA CIDADE

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **MOCIÓN**:

EXPOSICIÓN DE MOTIVOS

É sabido que a cidade de Santiago, como a maior parte das cidades que se foron construíndo ao longo dos séculos, ten un sistema de saneamento complexo no que conviven materiais e solucións técnicas superpostas que, mentres non se procede á súa renovación e adecuación, acaban por ocasionar problemas e disfuncións de moi diversa consideración.

A existencia dun sistema de saneamento maioritariamente unitario, onde converxen as augas residuais e as pluviais, e onde a rede separativa se circunscribe ás máis modernas urbanizacións, acrecenta as dificultades para unha correcta condución e tratamento das augas residuais, máxime naqueles terreos onde abonda a urbanización pechada e de carácter impermeable, como acontece en boa parte da nosa cidade, e especialmente no Núcleo histórico e no Ensanche, como principais zonas afectadas.

A pesar das importantes obras realizadas no conxunto da cidade neste terreo - algunhas delas de gran transcendencia aínda pendentes de acadar a súa plena funcionalidade- faise preciso avanzar nun estudo global e detallado da rede, as medidas concretas a adoptar, a súa priorización e a súa plena execución.

Esta planificación e o seu desenvolvemento adquire unha especial importancia no referente a aquelas zonas nas que se advirten reiterados problemas nas épocas de chuvia, que dan lugar a asolgamentos que ocasionan perdas e contratempas a boa parte da veciñanza da nosa cidade. A pesar dalgunhas actuacións puntuais acometidas nos últimos anos para tratar de minorar estes efectos, como as executadas na rúa do Franco, na zona dos Pelamios, no parque de Galeras e Carne de Abaixo ou na Avenida Mestra Vitoria Míguez, resta moito por facer para atallar as deficiencias que presenta a rede de sumidoiros da cidade.

O pasado día 12 de outubro, mércores, as precipitacións caídas na cidade inundaron varias zonas, principalmente nas rúas e locais de Frei Rosendo Salvado e na encrucillada de Entrerríos e Galeras. Volvía a repetirse, un ano despois, a situación acontecida en outubro de 2015 cando as precipitacións caídas provocaban inundacións case nos mesmos puntos. Daquela os informes municipais recoñecían que as follas tupiran os sumidoiros, mentres o concelleiro responsable aludía á “problemas estruturais”, “obras executadas por anteriores gobernos municipais” e circunstancia de que “a alerta laranxa se rexistro no domingo, cando traballan menos operarios”, para explicar o acontecido.



Segundo informou o Goberno, o concelleiro encargou en outubro de 2015 un informe sobre os puntos negros da cidade en caso de temporal e as posibles solucións. Con inusitada celeridade, un mes despois, en novembro de 2015, presentou os resultados dese estudo, no que se sinalaban 17 puntos conflictivos, cuantificando as accións precisas para a súa resolución en 350.000 euros.

Transcorrido un ano, non temos constancia de que actuacións se teñen desenvolvido para atallar os problemas detectados e mesmo comprobamos con asombro que a veciñanza se queixa de que a acumulación de follas pode estar na orixe dalgúns dos casos puntuais. Unha cuestión de doada solución intensificando os labores de limpeza nas datas e nos concretos lugares nos que acostuman a repetirse estas situacións.


Somos conscientes da complexidade de actuar simultaneamente e de atallar ao mesmo tempo todas as deficiencias no sistema de saneamento –de feito, no anterior mandato iniciouse o desenvolvemento dun “estudo de técnicas de drenaxe urbana sustentable” para que as novas áreas urbanas tiveran menor impacto nas redes de saneamento, que contemplaba un proxecto piloto para o río do Corgo, e que se ía presentar ante a Unión Europea para obter financiamento, aínda que finalmente parece que non o obtivo- pero non se precisan grandes investimentos para afrontar as principais urxencias, como as acometidas no anterior mandato ou as dezasete medidas detectadas no estudo realizado en novembro do ano pasado, que deberían ser executadas coa maior axilidade.

Tendo en conta todas estas consideracións, o Grupo Popular presenta para o seu debate e consideración no Pleno municipal a adopción do seguinte


ACORDO:

O Pleno insta ao correspondente órgano do Goberno municipal a:

- 1. Tomando como base os estudos municipais xa elaborados, executar con carácter inmediato un plan de actuacións urxentes para solucionar as deficiencias detectadas na rede de sumidoiros nas áreas habitualmente afectadas polas inundacións como consecuencia das precipitacións.***
- 2. Elaborar un cronograma con cada unha das actuacións, onde se recolla o prazo para o remate das obras, así como os pasos dados ata a súa completa execución.***
- 3. Establecer, en coordinación cos servizos de Meteogalicia, un sistema de avisos para que os servizos de emerxencia poidan estar en prealerta e actuar coa desexable anticipación.***

- 
4. **Incluir no orzamento municipal para o ano 2017 aqueles actuacións que non sexa posible afrontar con cargo ás disponibilidades orzamentarias actuais.**
 5. **Redactar un plan director para ampliar la rede separativa nun período realista e programar xa en 2017 actuacións neste senso.**

Santiago de Compostela, a 17 de outubro de 2016.



Agustín Hernández
Portavoz do Grupo Municipal Popular

